

Na osnovu člana 111. Zakona o bankama („Službene novine Federacije BiH“, broj: 27/17), čl. 5 stav (1) tačka h) i 19. stav (1) tačka c) Zakona o Agenciji za bankarstvo Federacije Bosne i Hercegovine („Službene novine Federacije BiH“, broj: 75/17) i člana 12. stav (1) tačka d) Statuta Agencije za bankarstvo Federacije Bosne i Hercegovine („Službene novine Federacije BiH“, broj: 3/18), Upravni odbor Agencije za bankarstvo Federacije Bosne i Hercegovine, na sjednici održanoj 12.05.2021. godine donosi

ODLUKU O OBJAVLJIVANJU PODATAKA I INFORMACIJA BANKE

Član 1.

Predmet

- (1) Ovom odlukom bliže se propisuju zahtjevi u pogledu sadržaja podataka i informacija koje je banka dužna da objavljuje u skladu sa Zakonom o bankama, kao i uslovi, način i rokovi njihovog objavljivanja.
- (2) Ova odluka primjenjuje se na banke sa sjedištem u Federaciji Bosne i Hercegovine, kojima je Agencija za bankarstvo Federacije Bosne i Hercegovine (u daljem tekstu: Agencija) izdala bankarsku dozvolu.
- (3) Na pitanja vezana za objavljivanje podataka i informacija banke koja nisu definirana ovom odlukom, a definirana su drugim propisom, primjenjivat će se odredbe tog propisa.

Član 2.

Obuhvat zahtjeva za objavu

- (1) Banka je dužna da objavi naziv, sjedište i organizacione dijelove banke, kao i kvantitativne i kvalitativne podatke o poslovanju i organizacionoj strukturi banke, rizičnom profilu banke i druge informacije koje se u skladu sa propisima ne smatraju zaštićenim ili povjerljivim, a koje su od značaja za informisanje javnosti o njenom finansijskom stanju i poslovanju.
- (2) Podaci i informacije iz stava (1) ovog člana odnose se na:
 - a) vlasničku strukturu i članove nadzornog odbora i uprave banke;
 - b) politiku naknada;
 - c) obuhvat primjene regulatornih zahtjeva, na pojedinačnoj ili na konsolidovanoj osnovi;
 - d) strategiju, ciljeve i politike upravljanja rizicima banke;
 - e) regulatorni kapital, zaštitne slojeve kapitala, kapitalne zahtjeve i adekvatnost regulatornog kapitala;
 - f) stopu finansijske poluge;
 - g) likvidnosne zahtjeve;
 - h) izloženosti po osnovu vlasničkih ulaganja banke;
 - i) kamatni rizik u bankarskoj knjizi;
 - j) interni proces procjene adekvatnosti kapitala (u daljem tekstu: ICAAP) i interni proces procjene adekvatnosti likvidnosti (u daljem tekstu: ILAAP);
 - k) neopterećenu (nezaloženu) i opterećenu (založenu) imovinu banke;
 - l) nekvalitetne i restrukturirane izloženosti i kolateral stečen preuzimanjem i provedbom izvršnog postupka.
- (3) Banka je dužna internim aktom urediti kriterije za utvrđivanje podataka, odnosno informacija iz stava (1) ovog člana, način procjene adekvatnosti objavljenih informacija, kontrole i tačnosti tih podataka, odnosno informacija, pravovremenost i učestalost njihovog objavljivanja i procjene da li se tim objavljivanjem učesnicima na finansijskom tržištu sveobuhvatno prikazuje rizični profil banke.

- (4) Sadržaj internog akta banke iz stava (3) ovog člana treba obuhvatiti primjenu općih zahtjeva za objavu, osiguravajući pri tome zasnovanost objave na načelima:
 - a) razumljivosti za ključne učesnike na finansijskom tržištu;
 - b) smislu objave i fokusiranosti na materijalno značajne informacije za sagledavanje rizičnog profila banke;
 - c) dosljednosti objava tokom vremena;
 - d) omogućavanja uporedivosti sa drugim bankama za ključne zainteresirane strane.
- (5) Ukoliko objavljeni podaci, odnosno informacije iz stava (2) ovog člana ne prikazuju sveobuhvatan rizični profil banke, banka je dužna da objavi i dodatne materijalno značajne informacije, odnosno podatke kojima se učesnicima na finansijskom tržištu omogućava sveobuhvatni prikaz rizičnog profila banke, a koje nisu zaštićene ili povjerljive.
- (6) Banka je dužna da osigura redovno, a najmanje jednom godišnje, provođenje interne revizije akta iz stava (3) ovog člana, kao i aktivnosti kojima će osigurati adekvatnost i tačnost podataka, odnosno informacija, te pravovremenost njihovog objavljivanja.

Član 3.

Izuzeci od obaveze objavljivanja

- (1) Izuzetno, banka nije dužna da objavljuje podatke i informacije iz člana 2. ove odluke koji nisu materijalno značajni, podatke i informacije čije bi javno objavljivanje moglo negativno da utječe na konkurentski položaj te banke na tržištu i podatke koji bi mogli negativno utjecati na sigurnost zaposlenika i članova nadzornog odbora i uprave banke, osim informacija vezanih za sistem internog upravljanja u banci, odnosno izbor i procjenu članova nadzornog odbora i uprave banke, regulatorni kapital i politiku naknada.
- (2) U smislu ove odluke, podacima i informacijama koji nisu materijalno značajni smatraju se podaci i informacije čije izostavljanje ili pogrešno navođenje ne bi moglo promijeniti ili utjecati na procjenu ili odluku osobe koja se oslanja na navedene informacije pri donošenju poslovnih odluka.
- (3) Izuzetno, banka može izostaviti objavu jedne ili više informacija i podataka ukoliko se radi o informacijama i podacima koji se smatraju zaštićenim i povjerljivim, odnosno predstavljaju bankarsku tajnu u skladu sa odredbama Zakona o bankama, osim u slučaju objave informacija i podataka vezano za regulatorni kapital i politiku naknada.
- (4) Informacije i podaci se smatraju zaštićenim ako bi njihova javna objava ugrozila konkurentski položaj banke na tržištu. One mogu uključivati informacije i podatke o proizvodima ili sistemima čija bi objava konkurentima umanjila vrijednost ulaganja banke koja su sa njima povezana. Informacije i podaci se smatraju povjerljivima ako postoje obaveze prema klijentima ili sa drugim ugovornim stranama koji banku obavezuju na zaštitu povjerljivosti.
- (5) Banka koja ne objavi podatke, odnosno informacije iz člana 2. st. (1) i (2) ove odluke dužna je da objavi činjenicu da ovi podaci, odnosno informacije nisu objavljeni, kao i opće informacije i razloge zbog kojih je ocijenila da ti podaci, odnosno informacije nisu materijalno značajne ili da predstavljaju bankarsku tajnu, odnosno da mogu negativno utjecati na njen konkurentski položaj na tržištu.

Član 4.

Podaci i informacije koje se odnose na vlasničku strukturu i članove nadzornog odbora i uprave banke

Banka je dužna da objavi sljedeće podatke, odnosno informacije:

- a) spisak dioničara banke koji imaju 5% ili više učešća u kapitalu banke ili glasačkim pravima u banci;
- b) o članovima nadzornog odbora i uprave banke i njihove ažurne biografije;

- c) broj direktorskih funkcija na kojima se nalaze članovi nadzornog odbora i uprave banke značajne s obzirom na veličinu, internu organizaciju i vrstu, obim i složenost poslova koje obavlja;
- d) politike za izbor i procjenu članova nadzornog odbora i uprave banke;
- e) o članovima odbora za reviziju i njihove biografije;
- f) o članovima odbora koje je u skladu sa zakonskim propisima osnovao nadzorni odbor (odbor za rizike, odbor za naknade, odbor za imenovanja), kao i učestalost zasjedanja tih odbora;
- g) način organizovanja funkcije interne revizije i rukovodioca interne revizije;
- h) imenovanog društva za reviziju finansijskih izvještaja.

Član 5.

Podaci i informacije koje se odnose na politiku naknada

Banka je dužna objaviti podatke i informacije koje se odnose na politiku naknada, uključujući i prakse za kategorije zaposlenika banke čije profesionalne aktivnosti imaju značajan utjecaj na rizični profil banke, odnosno podatke i informacije o:

- a) politikama i praksama naknada za identifikovane zaposlenike;
- b) postupku odlučivanja koji se primjenjuje pri određivanju politike naknada, kao i o broju sastanaka koje je održao odbor za naknade ili nadzorni odbor, ukoliko nije osnovan odbor za naknade, a koji nadziru naknade tokom finansijske godine. Navedeno može podrazumijevati i informacije o sastavu i mandatu odbora, vanjskom konsultantu čije su usluge korištene pri određivanju politike naknada, te ulozi relevantnih zainteresiranih strana;
- c) vezi između plaće i uspješnosti, uključujući ciljeve, broj zaposlenika za koje je politikom naknada predviđena isplata varijabilne naknade i način na koji varijabilna naknada reaguje na promjene u uspješnosti banke;
- d) najvažnijim karakteristikama sistema naknada (model i struktura) uključujući informacije o kriterijima koji se primjenjuju za mjerenje uspješnosti i prilagođavanju rizicima, politici odgode i kriterijima za prijenos prava iz naknada;
- e) omjeru između fiksnih i varijabilnih naknada, čije se raščlanjivanje za potrebe objave vrši prema relevantnim osnovama;
- f) kriterijima uspješnosti na kojima se zasnivaju prava na dionice, finansijske instrumente povezane sa dionicama ili varijabilnu naknadu;
- g) kriterijima i obrazloženjima varijabilnih naknada koji se dodjeljuju i isplaćuju u banci;
- h) ukupnim naknadama i zasebno prema značajnijim područjima poslovanja;
- i) zbiru svih naknada po kategorijama zaposlenika, naknadama podijeljenim na nadzorni odbor, upravu i ostale identifikovane zaposlenike banke;
- j) najvažnijim parametrima i argumentima za sistem varijabilnih naknada i drugih nenovčanih pogodnosti;
- k) broju zaposlenika čije naknade iznose 100.000 KM ili više u finansijskoj godini za koju se vrši objava podataka i informacija iz ovog člana.

Član 6.

Informacije o obuhvatu primjene regulatornih zahtjeva

- (1) Banka je dužna objaviti informacije o obuhvatu primjene regulatornih zahtjeva, na pojedinačnoj ili na konsolidovanoj osnovi.
- (2) U smislu stava (1) ovog člana, banka je dužna da objavljuje informacije koje se odnose na bankarsku grupu i odnos između matičnog društva pravnog lica i podređenih društava pravnog lica, odnosno sažet prikaz razlika u konsolidaciji za računovodstvene i supervizorske potrebe.
- (3) Prikaz razlika iz stava (2) ovog člana odnosi se na razlike između knjigovodstvene vrijednosti iskazane u objavljenim finansijskim izvještajima banke sačinjenih u skladu sa primjenjivim računovodstvenim okvirom i knjigovodstvene vrijednosti regulatornog obuhvata konsolidacije za potrebe supervizije bankarske grupe na konsolidovanoj osnovi.

- (4) Objava informacija iz stava (3) ovog člana zavisi od metode konsolidacije, tj. konsolidacije u skladu sa primjenjivim računovodstvenim okvirom i to onih na koje je primijenjena metoda:
- a) pune konsolidacije;
 - b) proporcionalne konsolidacije;
 - c) odbitka od regulatornog kapitala, odnosno koji su isključeni iz konsolidacije, s obzirom da učešće banke u kapitalu tih pravnih lica predstavlja odbitnu stavku od kapitala bankarske grupe;
 - d) nije konsolidovan, niti odbijen od regulatornog kapitala.

Član 7.

Podaci i informacije koje se odnose na strategiju, ciljeve i politike za upravljanje rizicima banke

Banka je dužna da objavljuje sljedeće podatke, odnosno informacije koje se odnose na strategiju, ciljeve i politike za upravljanje svim pojedinačnim značajnim rizicima kojima je izložena ili može biti izložena u svom poslovanju:

- a) kratak opis strategije i politika, za svaki pojedinačni rizik;
- b) strukturu, odnosno organizaciju funkcije upravljanja rizicima, uključujući njenu poziciju, ulogu i status u organizacionoj strukturi banke;
- c) obuhvatnost i karakteristike sistema izvještavanja o rizicima, kao i načina mjerenja rizika;
- d) ocjenu adekvatnosti uspostavljenog sistema upravljanja rizicima banke u odnosu na njen rizični profil, poslovnu politiku i strategiju;
- e) politike zaštite od rizika i politike (informacije o primijenjenim tehnikama smanjenja kreditnog rizika) smanjenja rizika, kao i načine koje banka koristi za osiguravanje i praćenje efikasnosti u smanjenju rizika;
- f) sažet opis povezanosti rizičnog profila banke sa njenom poslovnom strategijom, kao i sažeti prikaz ključnih pokazatelja poslovanja banke u vezi sa upravljanjem rizicima i njihovih vrijednosti, na osnovu kojih zainteresirani učesnici na finansijskom tržištu mogu ocijeniti upravljanje rizicima banke, kao i način na koji je tolerancija prema rizicima uključena u sistem upravljanja rizicima;
- g) opis načina na koji se osigurava izvještavanje nadzornog odbora i uprave banke o rizicima, posebno učestalost, područje, te način uključivanja nadzornog odbora i uprave banke u određivanje sadržaja izvještavanja;
- h) opći okvir sistema internih kontrola i način organizacije kontrolnih funkcija, uključujući i rukovodioce istih.

Član 8.

Podaci i informacije koje se odnose na regulatorni kapital

- (1) Banka je dužna da objavljuje podatke, odnosno informacije koje se odnose na regulatorni (priznati) kapital:
 - a) iznos regulatornog (priznatog) kapitala, kao i iznos redovnog osnovnog kapitala, dodatnog osnovnog kapitala i dopunskog kapitala banke, sa pregledom pojedinih elemenata kapitala;
 - b) opis osnovnih karakteristika finansijskih instrumenata koji se uključuju u obračun regulatornog kapitala;
 - c) opis svih ograničenja koja se primjenjuju pri izračunavanju regulatornog (priznatog) kapitala u skladu sa odredbama Odluke o izračunavanju kapitala banke, instrumenata kapitala, regulatornih usklađivanja i prilagođavanja na koje se ova ograničenja odnose.
- (2) Banka posebno objavljuje vrstu i iznos regulatornih usklađivanja, prilagođavanja i stavki koje nije dužna da odbija od elemenata regulatornog kapitala u skladu sa odredbama Odluke o izračunavanju kapitala banke.

Član 9.

Podaci i informacije koje se odnose na kapitalne zahtjeve i adekvatnost kapitala

- (1) Banka je dužna da objavljuje sljedeće podatke, odnosno informacije koje se odnose na kapitalne zahtjeve i adekvatnost kapitala:
 - a) iznos kapitalnog zahtjeva za kreditni rizik (standardizovani pristup) za svaku kategoriju izloženosti;
 - b) iznos kapitalnog zahtjeva za rizik namirenja (isporuke);
 - c) iznos pojedinačnih kapitalnih zahtjeva za tržišne rizike, sa posebnim objavljivanjem iznosa kapitalnog zahtjeva za specifični i opći rizik pozicije po osnovu dužničkih i vlasničkih instrumenata, dodatnog kapitalnog zahtjeva za velike izloženosti koje prekoračuju ograničenja definirana Odlukom o velikim izloženostima, kapitalnog zahtjeva za devizni rizik i kapitalnog zahtjeva za robni rizik;
 - d) iznos kapitalnog zahtjeva za operativni rizik i vrstu pristupa primijenjenog za računanje ovog zahtjeva (pristup osnovnog pokazatelja ili standardizovani pristup);
 - e) dodatni kapitalni zahtjevi za velike izloženosti iz knjige trgovanja i
 - f) stope kapitala (stopa redovnog osnovnog kapitala, stopa osnovnog kapitala i stopa regulatornog kapitala).
- (2) Banka je dužna da objavljuje sljedeće podatke, odnosno informacije koje se odnose na izloženost banke kreditnom riziku, uključujući tehnike smanjenja kreditnog rizika i informacije o vanjskim institucijama za procjenu kreditnog rizika - ECAI ili agencijama za kreditiranje izvoza - ECA:
 - a) primijenjenu definiciju izloženosti u statusu neizmirenja obaveza;
 - b) opis pristupa i metoda za utvrđivanje očekivanih kreditnih gubitaka za kreditni rizik;
 - c) ukupan iznos izloženosti banke nakon prilagodbe vrijednosti i rezervisanja, izuzimajući efekte tehnika smanjenja kreditnog rizika (neto izloženosti), kao i prosječni iznos neto izloženosti tokom perioda, po kategorijama izloženosti;
 - d) geografsku podjelu izloženosti po značajnijim područjima i kategorijama izloženosti uz detaljniju razradu po potrebi;
 - e) podjelu izloženosti prema vrsti djelatnosti i kategorijama izloženosti uz detaljniju razradu prema potrebi;
 - f) preostali rok dospijeca svih izloženosti i po kategorijama izloženosti, a ako je primjenjivo i detaljnije;
 - g) prema značajnoj privrednoj grani, iznos bruto izloženosti u statusu neizmirenja obaveza, bruto iznosu dospjelih nenaplaćenih potraživanja i bruto iznosu ostalih izloženosti sa pripadajućim ispravkama vrijednosti (rezervisanjima za očekivane kreditne gubitke);
 - h) prikaz promjena u ispravkama vrijednosti (rezervisanjima za očekivane kreditne gubitke) iz tačke g) ovog stava tokom izvještajnog perioda, koji uključuje početno stanje, promjene u toku izvještajnog perioda i završno stanje;
 - i) za svaku od kategorija izloženosti:
 - 1) naziv odabrane ECAI ili ECA, kao i razloge za svaku promjenu izbora istih,
 - 2) kategorije izloženosti za koje se upotrebljava procjena kreditnog rejtinga ECAI ili ECA,
 - 3) opis procedura koje se odnose na primjenu kreditnog rejtinga izdavaoca ili emitovanih finansijskih instrumenata izdavaoca na pojedine pozicije iz bankarske knjige,
 - 4) raspoređivanje kreditnih rejtinga izabrane ECAI ili ECA u odgovarajuće nivoe kreditnog rizika,
 - 5) iznose izloženosti prije i poslije korištenja kreditne zaštite za izloženosti koje nisu u statusu neizmirenja obaveza i za izloženosti u statusu neizmirenja obaveza.

Član 10.

Podaci i informacije koje se odnose na zaštitne slojeve kapitala

- (1) Banka je dužna da objavljuje podatke, odnosno informacije koje se odnose na zahtjeve za održavanje zaštitnog sloja kapitala za očuvanje kapitala i ostale zaštitne slojeve kapitala, u skladu sa odredbama Odluke o izračunavanju kapitala banke.
- (2) U slučaju propisivanja primjene protucikličnog zaštitnog sloja kapitala, obaveza banke bi se odnosila na objavu:
 - a) ukupnog iznosa protucikličnog zaštitnog sloja kapitala banke i
 - b) geografske raspodjele izloženosti značajnih za izračunavanje protucikličnog zaštitnog sloja kapitala.

Član 11.

Podaci i informacije koje se odnose na stopu finansijske poluge

Banka je dužna da objavljuje sljedeće podatke, odnosno informacije o stopi finansijske poluge i upravljanju rizikom prekomjerne finansijske poluge:

- a) stopu finansijske poluge izračunatu u skladu sa odredbama Odluke o izračunavanju kapitala banke;
- b) pregled stavki uključenih prilikom utvrđivanja ukupne izloženosti banke, koja predstavlja nazivnik prilikom izračunavanja stope finansijske poluge;
- c) opis najznačajnijih faktora koji su utjecali na promjenu stope finansijske poluge u odnosu na prethodnu objavu i
- d) opis postupaka koje banka primjenjuje za upravljanje rizikom prekomjerne finansijske poluge.

Član 12.

Podaci i informacije koje se odnose na likvidnosne zahtjeve

Banka je dužna da objavljuje sljedeće podatke, odnosno informacije koji se odnose na kvalitativne i kvantitativne zahtjeve za upravljanje rizikom likvidnosti u skladu sa Odlukom o upravljanju rizikom likvidnosti banke, a najmanje:

- a) strategije i postupke za upravljanje rizikom likvidnosti;
- b) način organizovanja funkcije upravljanja rizikom likvidnosti u banci, uključujući i sistem izvještavanja i mjerenja rizika likvidnosti;
- c) politike i postupke za praćenje stalne efikasnosti zaštite od rizika likvidnosti i smanjenja rizika likvidnosti;
- d) opis izloženosti riziku likvidnosti i usklađenost sa strategijom iz tačke a) ovog stava i
- e) podatke o koeficijentu pokrića likvidnosti (LCR), uključujući pregled stavki uključenih prilikom izračunavanja tog koeficijenta.

Član 13.

Podaci i informacije koje se odnose na izloženosti po osnovu vlasničkih ulaganja banke

Banka je dužna da objavljuje sljedeće podatke, odnosno informacije koje se odnose na izloženosti po osnovu vlasničkih ulaganja u bankarskoj knjizi:

- a) podjelu izloženosti prema namjeri ulaganja, uključujući i namjeru ostvarivanja kapitalne dobiti i strateške razloge;
- b) pregled korištenih računovodstvenih politika i metoda vrednovanja, uključujući i osnovne pretpostavke i pristupe koji utječu na utvrđivanje vrijednosti, kao i svaku njihovu značajnu promjenu;
- c) vrstu, prirodu i iznose izloženosti po osnovu:
 - 1) vlasničkih ulaganja kojima se trguje na berzi,
 - 2) vlasničkih ulaganja kojima se ne trguje na berzi, a koja su u dovoljno diverzificiranim portfolijima i

- 3) ostalih vlasničkih ulaganja,
- d) ukupan realizirani dobitak/gubitak za prethodni period koji proističe iz prodaje ili zatvaranja pozicija po osnovu vlasničkih ulaganja.

Član 14.

Podaci i informacije koje se odnose na kamatni rizik u bankarskoj knjizi

- (1) Banka je dužna da objavljuje podatke, odnosno informacije koje se odnose na izloženost kamatnom riziku po osnovu pozicija iz bankarske knjige, kao i na pristupe za mjerenje, odnosno procjenu tog rizika.
- (2) Podaci i informacije iz stava (1) ovog člana odnose se na sljedeće:
 - a) izvore ovog rizika, metode i učestalost njegovog mjerenja;
 - b) osnovne pretpostavke za mjerenje, odnosno procjenu izloženosti ovom riziku, uključujući i pretpostavke o prijevremenim otplatama kredita i kretanju depozita po viđenju;
 - c) promjeni prihoda, ekonomske vrijednosti ili drugih faktora uslijed kamatnih šokova u skladu s metodom koja je utvrđena za mjerenje kamatnog rizika po značajnim valutama.

Član 15.

Podaci i informacije koje se odnose na ICAAP i ILAAP

- (1) Banka je dužna da objavljuje sljedeće podatke, odnosno informacije koje se odnose na postupak ICAAP-a:
 - a) sažet opis ICAAP-a i
 - b) sažet opis pristupa koje banka koristi za mjerenje, tj. procjenu svih značajnih rizika.
- (2) Banka je dužna da objavljuje sažet opis postupka ILAAP-a.
- (3) Banka je dužna da na zahtjev Agencije objavi rezultat postupka iz st. (1) i (2) ovog člana, kao i dodatne kapitalne zahtjeve koje je Agencija odredila pri kontroli poslovanja banke, na osnovu ocjene adekvatnosti i pouzdanosti postupka ICAAP-a, njegovog dosljednog provođenja i rezultata te procjene.

Član 16.

Podaci i informacije koje se odnose na neopterećenu (nezaloženu) i opterećenu (založenu) imovinu

- (1) Banka je dužna da objavljuje podatke, odnosno informacije o iznosu neopterećene (nezaložene) i opterećene (založene) imovine, prema vrsti imovine u skladu sa primjenjivim računovodstvenim okvirom.
- (2) Opterećena (založena) imovina iz stava (1) ovog člana je bilansna imovina koja je založena ili prenesena bez prestanka priznavanja ili je opterećena na neki drugi način, te primljeni kolateral koji ispunjava uslove za priznavanje u bilansu banke primaoca, u skladu sa primjenjivim računovodstvenim okvirom.
- (3) U smislu st. (1) i (2) ovog člana, banka je dužna objaviti sljedeće podatke, odnosno informacije:
 - a) knjigovodstvenu vrijednost neopterećene (nezaložene) i opterećene (založene) imovine;
 - b) strukturu opterećene (založene) imovine, prema vrsti imovine, uz posebno navođenje promjena nakon posljednje javne objave;
 - c) strukturu opterećene (založene) imovine unutar bankarske grupe;
 - d) opisne informacije o utjecaju njenog poslovnog modela na nivo opterećenosti i važnosti opterećenja za njen model finansiranja;
 - e) o prekomjernom osiguranju kolateralom, odnosno o slučajevima kada je vrijednost imovine date u zalag veća od knjigovodstvene vrijednosti sredstva;
 - f) opis općih uslova ugovora o osiguranju kolateralom koji su sklopljeni radi osiguranja obaveza banke i
 - g) ostale informacije koje su važne za procjenu njene opterećene imovine.

Član 17.

Nekvalitetne i restrukturirane izloženosti i stečeni kolateral

Banka je dužna da objavljuje podatke, odnosno informacije usklađene sa odredbama Odluke o upravljanju kreditnim rizikom i utvrđivanju očekivanih kreditnih gubitaka o:

- a) kreditnoj kvaliteti izloženosti razvrstanoj u nivoe kreditnog rizika sa pripadajućim iznosima očekivanih kreditnih gubitaka;
- b) kreditnoj kvaliteti kredita prema sektorskoj strukturi kredita;
- c) kreditnoj kvaliteti restrukturiranih izloženosti;
- d) promjenama stanja nekvalitetnih izloženosti i pripadajućih očekivanih kreditnih gubitaka tokom izvještajnog perioda, što uključuje početno stanje, promjene u toku izvještajnog razdoblja i završno stanje;
- e) podatak o ukupnom iznosu kolaterala stečenog preuzimanjem i provedbom izvršnog postupka.

Član 18.

Uslovi, način i rokovi objavljivanja podataka i informacija banke

- (1) Banka je dužna da podatke, odnosno informacije propisane ovom odlukom objavljuje na svojoj službenoj internet stranici i to na početnoj stranici ili u dijelu stranice koji je namijenjen za objavljivanje finansijskih izvještaja banke u skladu sa propisima o računovodstvu i reviziji, na način koji je lako uočljiv korisnicima, odnosno zainteresiranim učesnicima na finansijskom tržištu.
- (2) Način na koji se objavljuju podaci, odnosno informacije propisane ovom odlukom, sa pripadajućim sadržajem i opisima, utvrđen je Uputstvom za objavljivanje podataka i informacija banke.
- (3) Ako banka pojedine podatke, odnosno informacije propisane ovom odlukom objavljuje na drugačiji način, u skladu s drugim propisima, smatra se da je ispunila obavezu njihovog objavljivanja u skladu sa ovom odlukom, pod uslovom da na svojoj službenoj internet stranici navede gdje su ti podaci objavljeni na isti način kao u stavu (1) ovog člana, izuzev podataka i informacija iz člana 2. stav (2) tačke d), e) i f) ove odluke.
- (4) Banka je dužna da podatke, odnosno informacije propisane ovom odlukom objavljuje najmanje jednom godišnje, sa stanjem na finansijski datum 31. decembar prethodne godine i to najkasnije do 31. maja tekuće godine.
- (5) Banka je dužna da najmanje jednom godišnje procjenjuje da li je podatke, odnosno informacije propisane ovom odlukom potrebno objavljivati češće nego što je propisano u stavu (4) ovog člana, uzimajući u obzir sljedeće podatke, odnosno informacije:
 - a) obim poslovnih operacija;
 - b) bankarske proizvode koje nudi klijentima;
 - c) prisutnost u različitim državama;
 - d) učešće u bankarskom sektoru;
 - e) učešće na međunarodnim finansijskim tržištima;
 - f) učešće u međunarodnom platnom, obračunskom i kliring sistemu.
- (6) Banke su dužne vršiti provjeru objavljenih podataka, odnosno informacija propisanih ovom odlukom, osiguravajući nivo provjera i procesa internih kontrola koji je istovjetan onima koje primjenjuje u finansijskom izvještavanju, odnosno izvještavanju nadzornog odbora i uprave banke.
- (7) U svrhu postupanja u skladu sa stavom (6) ovog člana, nadzorni odbor i uprava banke odgovorni su za uspostavu i održavanje efikasne politike provjere podataka, odnosno informacija koje banka objavljuje, što uključuje i njihovu obavezu da u pisanom obliku potvrde da su objave pripremljene u skladu sa odredbama ove odluke i propisima koji regulišu kapitalne zahtjeve, upravljanje rizicima i proces internih kontrola na nivou banke.

Član 19.

Primjena odluke

- (1) Banka je dužna uskladiti se sa odredbama ove odluke prilikom godišnje javne objave za 2020. godinu, osim odredbi o objavi podataka, odnosno informacija o opterećenoj (založenoj) i neopterećenoj (nezaloženoj) imovini i o nekvalitetnim i restrukturiranim izloženostima i stečenim kolateralom, sa kojom se dužna uskladiti prilikom godišnje javne objave za 2021. godinu.
- (2) Banka je dužna godišnju javnu objavu iz stava (1) ove odluke objaviti za 2020. godinu do 30.06.2021. godine, a za svaku narednu javnu godišnju objavu u skladu sa ovom odlukom.
- (3) U slučaju materijalno značajnog iznosa opterećene (založene) imovine, banka je dužna izvršiti javnu objavu istog prije redovne godišnje javne objave iz stava (1) ovog člana.
- (4) U svrhu primjene odredbi ove odluke direktor Agencije će u roku od 30 dana od dana njenog stupanja na snagu donijeti Uputstvo za objavljivanje podataka i informacija banke.

Član 20.

Stupanje na snagu odluke

- (1) Stupanjem na snagu ove odluke prestaje da važi Odluka o objavljivanju podataka i informacija banke („Službene novine Federacije BiH“, broj 81/17).
- (2) Ova odluka stupa na snagu osmog dana od dana objavljivanja u „Službenim novinama Federacije BiH“.

Broj: U.O.-60-03/21
Sarajevo, 12.05.2021. godine

PREDSJEDNICA
UPRAVNOG ODBORA

mr. sc. Ljerka Marić, dipl.ecc., s.r.